



**REPUBLIKA E SHQIPËRISË**  
**KOMISIONI QENDROR I ZGJEDHJEVE**  
**KOMISIONERI SHTETËROR I ZGJEDHJEVE**

Tiranë më 21.7.2026

Nr. 1779 prot.

**NJOFTIM**

**Për thirrjen e mbledhjes së Komisionit Rregullator**

E nderuar Kryetare e Komisionit Rregullator,

Të nderuar anëtarë,

Në mbështetje të shkronjës "c", të pikës 1, të nenit 19, të ligjit nr.10019, datë 29.12.2008 "Kodi Zgjedhor i Republikës së Shqipërisë", të ndryshuar, Komisioneri vë në lëvizje Komisionin Rregullator sa herë që paraqiten çështje të kompetencës së tij.

Ju vë në dijeni se është përgatitur projektvendimi si vijon:

1. Projektvendim "Për miratimin e rregullave të procedurës së mbledhjes dhe administrimit të nënshkrimeve për nismat ligjvënëse të zgjedhësve në Republikën e Shqipërisë".

Propozoj thirrjen e mbledhjes së Komisionit Rregullator për shqyrtimin e këtij projektvendimi.

Bashkëlidhur do të gjeni kopje të projektvendimit dhe relacionit shoqërues.

**Komisioneri Shtetëror i Zgjedhjeve**

**Ilirjan CELIBASHI**





**KOMISIONI QENDROR I ZGJEDHJEVE**  
**KOMISIONERI SHTETËROR I ZGJEDHJEVE**

Drejtoria e Ligjshmërisë

**RELACION**  
**PËR**  
**PROJEKTVENDIM**  
**PËR**

**MIRATIMIN E RREGULLAVE TË PROCEDURËS SË MBLEDHJES DHE**  
**ADMINISTRIMIT TË NËNSHKRIMEVE PËR NISMAT LIGJVËNËSE TË**  
**ZGJEDHËSVE NË REPUBLIKËN E SHQIPËRISË**

**I. VLERËSIMI I LIGJSHMËRISË DHE HARMONIZIMI ME LEGJISLACIONIN NË FUQI**

Referuar nenit 20, pika 1, shkronja “a”, të ligjit nr. 10019, datë 29.12.2008 “Kodi Zgjedhor i Republikës së Shqipërisë”, të ndryshuar, Komisioni Rregullator shqyrton dhe miraton projektaktet me karakter normativ, të përgatitura nga administrata e Komisionit Qendror të Zgjedhjeve, për rregullat e detajuara për organizimin dhe administrimin e zgjedhjeve dhe referendumeve, detyrat e administratës zgjedhore dhe procedurat që zbatohen në zgjedhje.

Duke vlerësuar nga pikëpamja e objektit që trajton ky projektvendim, vlerësohet nga ana e ligjshmërisë së është në kompetencë të Komisionit Rregullator për ta shqyrtuar.

**II. PËRMBLEDHJE SHPJEGUESE E PËRMBAJTJES SË PROJEKTAKTIT**

Projektvendimi “Për miratimin e rregullave të procedurës së mbledhjes dhe administrimit të nënshkrimeve për nismat ligjvënëse të zgjedhësve në Republikën e Shqipërisë” hartohet me qëllim përcaktimin e rregullave të hollësishme procedurale që do të ndiqen për organizimin, administrimin dhe verifikimin e procesit të mbledhjes së nënshkrimeve nga zgjedhësit, në funksion të ushtrimit të së drejtës për nismat ligjvënëse.

Ky projektvendim synon të garantojë zhvillimin e një procedure të qartë, transparente, të standardizuar dhe të zbatueshme në praktikë, duke siguruar respektimin e parimeve të ligjshmërisë, barazisë së qytetarëve përpara ligjit, integritetit të procesit dhe mbrojtjes së të dhënave personale të zgjedhësve.

Gjithashtu, projektvendimi synon të unifikojë praktikat administrative që lidhen me administrimin e formularëve të nënshkrimeve, mënyrën e identifikimit të mbështetësve, procedurat e dorëzimit dhe verifikimit të nënshkrimeve, si dhe detyrimet e subjekteve përgjegjëse për administrimin e procesit.



Projektvendimi mbështetet në dispozitat ligjore të përcaktuara në ligjin nr. 54/2019 “Për nismën ligjvënëse të zgjedhësve në Republikën e Shqipërisë”.

Nevoja për miratimin e këtij projektvendimi lind nga domosdoshmëria për të pasur një kuadër të plotë dhe të detajuar procedural lidhur me mbledhjen e nënshkrimeve për nismat ligjvënëse, me qëllim shmangien e paqartësive administrative dhe garantimin e zbatimit të njëtrajtshëm të legjislacionit në fuqi.


Projektvendimi rregullon procedurat për mbledhjen e nënshkrimeve në kuadër të nismave ligjvënëse, duke përcaktuar vendet e autorizuar për zhvillimin e këtij procesi, si dhe kërkesat lidhur me formën, përmbajtjen dhe mënyrën e administrimit të plotësimit të fletëve të nënshkrimeve.

Projektvendimi parashikon rregulla të detajuara mbi mënyrën e mbledhjes dhe administrimit të nënshkrimeve për nismat ligjvënëse. Në mënyrë të veçantë, përcaktohet përdorimi i detyrueshëm i fletëve tip të miratuara nga Komisioni Qendror i Zgjedhjeve, përmbajtja e tyre, të dhënat identifikuese që duhet të plotësohen nga zgjedhësit, si dhe elementet që lidhen me identifikimin dhe përgjegjësinë e anëtarëve të grupit të mbledhjes së nënshkrimeve. Gjithashtu projektvendimi përcakton edhe hapat proceduriale të dorëzimit dhe verifikimit të nënshkrimeve.

Për sa më sipër, në këtë relacion, Komisioneri Shtetëror i Zgjedhjeve, brenda kompetencave dhe në respektim të detyrimeve e afateve ligjore të përcaktuara në ligjin nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, i propozon Komisionit Rregullator për shqyrtim dhe miratim, projektvendimin “Për miratimin e rregullave të procedurës së mbledhjes dhe administrimit të nënshkrimeve për nismat ligjvënëse të zgjedhësve në Republikën e Shqipërisë”.

**Komisioneri Shtetëror i Zgjedhjeve**

**Ilirjan CELIBASHI**





REPUBLIKA E SHQIPËRISË  
KOMISIONI QENDROR I ZGJEDHJEVE  
KOMISIONI RREGULLATOR

Tiranë më

protdate

Nr.

protnumber

Data: DD MM VVVV

Nr:000-000

Ora: HH:MM

**PROJEKTVENDIM**

**PËR**

**MIRATIMIN E RREGULLAVE TË PROCEDURËS SË MBLEDHJES DHE  
ADMINISTRIMIT TË NËNSHKRIMEVE PËR NISMAT LIGJVËNËSE TË  
ZGJEDHËSVE NË REPUBLIKËN E SHQIPËRISË**

Në mbështetje të nenit 20, pika 1, shkronja "a", dhe pika 3, të ligjit nr. 10019, datë 29.12.2008, "Kodi Zgjedhor i Republikës së Shqipërisë", të ndryshuar, ligjit nr. 54/2019 "Për nismën ligjvënëse të zgjedhësve në Republikën e Shqipërisë", me propozimin e Komisionerit Shtetëror të Zgjedhjeve, Komisioni Rregullator

**V E N D O S I:**

**Neni 1**

**Qëllimi**

Ky vendim përcakton rregullat dhe procedurat për mbledhjen dhe administrimin e nënshkrimeve për nismat ligjvënëse të zgjedhësve në Republikën e Shqipërisë, si dhe përgjegjësitë e organeve dhe subjekteve të përfshira në këtë proces.

**Neni 2**

**Rregulla të përgjithshme**

1. Procesi i mbledhjes së nënshkrimeve për nismat ligjvënëse realizohet në përputhje me parimet e ligjshmërisë, transparencës, përgjegjshmërisë, gjithpërfshirjes, paanshmërisë dhe garantimit të besueshmërisë së këtij procesi.
2. Nënshkrimet mbledhen vetëm nga zgjedhës që gëzojnë të drejtën e votës, sipas legjislacionit në fuqi.
3. Çdo nënshkrim duhet të jetë i identifikueshëm, i administruar në formatin e miratuar dhe i shoqëruar me të dhënat e nevojshme për verifikimin e vlefshmërisë së tij.

Data: dd mmvvvv Nr: 123-456  
Ora: hh:mm



"Për miratimin e rregullave të procedurës së mbledhjes dhe administrimit të nënshkrimeve për nismat ligjvënëse të zgjedhësve në Republikën e Shqipërisë"

4. Komisioni Qendror i Zgjedhjeve (KQZ) administron procesin e depozitimit dhe verifikimit të nënshkrimeve, sipas procedurave të përcaktuara në këtë vendim dhe në akte të tjera nënligjore.
5. Të dhënat personale të zgjedhësve që nënshkruajnë vullnetarisht dhe personalisht në fletën e mbledhjes së nënshkrimeve përpunohen dhe mbrohen në përputhje me legjislacionin për mbrojtjen e të dhënave personale.

### Neni 3 Përkufizime

1. “Nismë ligjvënëse e zgjedhësve” është propozimi në formë të shkruar i një projektligji, i nënshkruar nga jo më pak se 20 000 zgjedhës, drejtuar Kuvendit të Shqipërisë.
2. “Përfaqësia/Komiteti përfaqësues i nismës” janë strukturat që përfaqësojnë nismëtarët në të gjitha veprimtaritë para shtetasve të tjerë, institucioneve, si dhe Kuvendit të Shqipërisë.
3. “Grupi i mbledhjes së nënshkrimeve” është struktura përgjegjëse për mbledhjen e nënshkrimeve mbështetëse të nismës, në mjediset publike dhe private.
4. “Mjedise të mbledhjes së nënshkrimeve” janë hapësirat publike ose private, me adresë dhe nëse është e mundur të numërtuara, ku realizohet procesi i mbledhjes së nënshkrimeve të mbështetësve të nismës.
5. “Verifikim i nënshkrimeve” është procesi i verifikimit të fletëve të nënshkrimeve, si dhe i të dhënave të mbështetësve të nismës ligjvënëse, që realizohet nga Komisioni Qendror i Zgjedhjeve.
6. “Fletët e mbledhjes së nënshkrimeve” janë fletë tip për mbledhjen e nënshkrimeve të mbështetësve të nismës, të miratuara nga Komisioni Qendror i Zgjedhjeve.
7. “Zgjedhës” është çdo shtetas me të drejtë vote, sipas nenit 45 të Kushtetutës së Republikës së Shqipërisë.

### Neni 4 Mbledhja e nënshkrimeve

1. Mbledhja e nënshkrimeve për nismat ligjvënëse kryhet vetëm pas miratimit të regjistrimit të nismës nga KQZ.
2. Nënshkrimet mblidhen nga grupi /grupet e mbledhjes së nënshkrimeve me autorizim të komitetit përfaqësues të nismës, në përputhje me legjislacionin në fuqi dhe këtë vendim. Një kopje e autorizimeve depozitohet në KQZ.
3. Çdo person i autorizuar për mbledhjen e nënshkrimeve duhet të jetë zgjedhës me të drejtë vote dhe të identifikohet përmes dokumentit të identifikimit dhe autorizimit të lëshuar nga komiteti përfaqësues i nismës.
4. Mbledhja e nënshkrimeve kryhet në mënyrë të drejtpërdrejtë, duke garantuar që zgjedhësi të nënshkruajë vullnetarisht dhe personalisht.
5. Ndalohet ushtrimi i çdo forme presioni, ndikimi të padrejtë, premtimi për përfitim ose ofrimi i përfitimeve materiale në këmbim të nënshkrimit.
6. Zgjedhësi mund të mbështesë vetëm një herë të njëjtën nismë ligjvënëse.



## **Neni 5**

### **Mjediset e mbledhjes së nënshkrimeve**

1. Nënshkrimet mund të mblidhen në mjedise publike dhe private, të vendosura në dispozicion për këtë qëllim dhe të përcaktuara nga komiteti përfaqësues i nismës, në përputhje me legjislacionin në fuqi.
2. Mjediset e mbledhjes së nënshkrimeve duhet të jenë të identifikuar qartë dhe të aksesueshme për zgjedhësit.
3. Ndalohet mbledhja e nënshkrimeve në mjedise ose rrethana që pengojnë lirinë e zgjedhësit për të shprehur vullnetin e tij të lirë.
4. Komiteti përfaqësues i nismës është përgjegjës për organizimin e procesit të mbledhjes së nënshkrimeve dhe për respektimin e rregullave të përcaktuara në legjislacionin në fuqi dhe në këtë vendim.

## **Neni 6**

### **Forma dhe plotësimi i fletëve të nënshkrimeve**

1. Nënshkrimet mblidhen vetëm në fletët tip të miratuara nga Komisioni Qendror i Zgjedhjeve.
2. Fleta tip e mbledhjes së nënshkrimeve, në njërën anë përmban informacionin mbi nismën ligjvënëse që do t'i propozohet Kuvendit, qëllimin dhe një shpjegim të përmbledhur të saj, si dhe të dhëna për përfaqësinë/komitetin përfaqësues të nismës. Në anën tjetër, fleta e mbledhjes së nënshkrimeve përmban:
  - a) numrin rendor;
  - b) gjenealitetet e zgjedhësit që mbështet nismën;
  - c) vendin dhe datën e lindjes;
  - ç) numrin e letërnjoftimit apo të pasaportës të vlefshme të zgjedhësit;
  - d) numrin e kontaktit;
  - dh) kolonën për nënshkrimet e zgjedhësve;
  - e) hapësirën përkatëse për emrin dhe mbiemrin e anëtarëve të grupit të mbledhjes së nënshkrimeve që përfshihen në procesin e mbledhjes së nënshkrimeve, ku ata nënshkruajnë për faktin që kanë realizuar këtë proces.

## **Neni 7**

### **Dorëzimi i nënshkrimeve**

1. Nënshkrimet e mbledhura dorëzohen pranë KQZ nga komiteti përfaqësues i nismës ose përfaqësuesi i tij i autorizuar.
2. Dorëzimi i nënshkrimeve bëhet sipas përcaktimit në vendimin e Komisionerit Shtetëror të Zgjedhjeve (KSHZ) për pajisjen me fletët tip për mbledhjen e nënshkrimeve.
3. Nënshkrimet dorëzohen në formularët origjinalë, në formë fizike.
4. Për dorëzimin e nënshkrimeve mbahet procesverbal, në të cilin pasqyrohen data e dorëzimit, numri i fletëve, numri i nënshkrimeve dhe identiteti i personit që i dorëzon.



**Neni 8**  
**Verifikimi i nënshkrimeve**

1. Verifikimi i nënshkrimeve kryhet nga administrata e KQZ-së, sipas procedurave të përcaktuara me vendim të KSHZ.
2. Pas përfundimit të verifikimit administrativ, administrata e KQZ-së harton një raport të detajuar për procesin e verifikimit të nënshkrimeve në të cilin pasqyrohen edhe mangësitë dhe parregullsitë nëse janë konstatuar gjatë procesit të verifikimit.
3. Raporti i verifikimit administrativ të nënshkrimeve shqyrtohet në seancë publike të KSHZ, në prani të palës së interesuar.
4. Në përfundim të shqyrtimit, KSHZ merr vendim për pranimin ose refuzimin e listës mbështetëse të nënshkrimeve.
5. Kundër aktit administrativ të KSHZ-së mund të bëhet ankim nga subjekti i interesuar në Gjykatën Administrative të Shkallës së Parë Tiranë.

**Neni 9**  
**Dispozitat Përfundimtare**

1. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
2. Ngarkohet Komisioni Qendror i Zgjedhjeve për zbatimin e këtij vendimi.
3. Kundër këtij vendimi mund të bëhet ankim në Kolegjin Zgjedhor Gjyqësor pranë Gjykatës Administrative të Apelit Tiranë, brenda 30 (tridhjetë) ditëve nga shpallja e tij.

**Kryetar**  
**Ilirjana NANO**

**Anëtar**  
**Arben RISTANI**

**Anëtar**  
**Bledar SKËNDERI**

**Anëtar**  
**Helga VUKAJ**

**Anëtar**  
**Dritan ÇAKA**

Data: dd mmvvvvNr: 123-456  
Ora: hh:mm



"Për miratimin e rregullave të procedurës së mbledhjes dhe administrimit të nënshkrimeve për nismat ligjvënëse të zgjedhëse në Republikën e Shqipërisë"